

შიდა ქართლის გუბერნატორი სოფელ დიცი საბავშვო ბაღის გახსნას დაესწრო

24 თებერვალი 2015

„ჩემთვის ემოციური დღეა, რადგან დიცი ჩემი სოფელია, სადაც ბავშვობაში ხშირად ჩამოვდიოდი. აქ 25 წელიწადი არ ფუნქციონირებდა საბავშვო ბაღი და ჩვენი მეგობრების დახმარებით გაიხსნა ახალი ბაღის შენობა. მინდა მხარდაჭერა გამოგიცხადოთ მთავრობის და მეგობარი ქვეყნების სახელით“ – აღნიშნა პრემიერმა დიციში სტუმრობისას. მთავრობის მეთაურმა მადლობა გადაუხადა ლატვიის რესპუბლიკის საელჩოს საქართველოში საბავშვო ბაღის სრული ტექნიკური აღჭურვისთვის და განხორციელებულ პროექტს ქვეყნებს შორის მეგობრული და პარტნიორული ურთიერთობის კიდევ ერთი ნათელი მაგალითი უწოდა. ამერიკის შეერთებული შტატების ელჩის, რიჩარდ ნორლანდის განცხადებით, მნიშვნელოვანია, რომ კონფლიქტის ზონაში მცხოვრები მოსახლეობა გრძნობდეს მხარდაჭერას. „არავის დავინწყებია ეს სოფლები და მისი მოსახლეობა. არავის დავინწყებია, რომ თქვენი აქ ყოფნა და თქვენი ძალისხმევა ძალიან მნიშვნელოვანია“ – მიმართა რიჩარდ ნორლანდმა დიციის მოსახლეობას. ლატვიის სრულუფლებიანმა ელჩმა საქართველოში, ელიტა გაველემ სოფელ დიციში საბავშვო ბაღის გახსნას მნიშვნელოვანი მოვლენა უწოდა. მისივე განცხადებით, პრემიერ-მინისტრისა და დიპლომატების სტუმრობა დიციში, კიდევ ერთი დასტურია იმის, თუ რამდენად მნიშვნელოვანია საქართველოს ხელისუფლებისთვის გამყოფ ხაზთან მდებარე სოფლები და მათი პრობლემები. გორის მუნიციპალიტეტის სოფელ დიციში 25 წელია, რაც საბავშვო ბაღმა ფუნქციონირება შეწყვიტა. 2014 წელს, სოფლის განვითარების პროგრამის ფარგლებში, ასევე ბერძნული სამედიცინო ფონდის- „ჰიპოკრატეს“ დახმარებით, გარემონტდა მუნიციპალური შენობა, ხოლო საბავშვო ბაღის ინვენტარით სრულად აღჭურვა უზრუნველყო ლატვიის საგარეო საქმეთა სამინისტრომ და ლატვიის რესპუბლიკის საელჩომ საქართველოში.